

RUU tubuh Ombudsman dibentang akhir tahun

Inisiatif bawah NACP 2019-2023 kini di Jabatan Peguam Negara untuk dimuktamad

Seremban: Satu rang undang-undang (RUU) baharu berkaitan penubuhan Ombudsman di Malaysia dijangka dibentangkan di Parlimen sebelum akhir tahun ini.

Ketua Pengarah Pusat Governors, Integriti dan Antirasuah Nasional (GIACC), Tan Sri Abu Kassim Mohamed, berkata RUU yang menjadi antara inisiatif utama di bawah Pelan Antirasuah Nasional (NACP) 2019-2023 itu, akan dibentangkan dalam persidangan pada November atau Disember dan kini berada di Jabatan Peguam Negara untuk dimuktamad.

Katanya, Ombudsman adalah pegawai yang dilantik untuk menerima dan menyiasat aduan berkaitan salah guna kuasa oleh eksekutif serta pentadbirannya dan sistem ini diwujudkan bagi mencapai keadilan dalam pentadbiran.

Katanya, mana-mana orang awam yang mengadu mengalami ketidakadilan dalam layanan yang diterima daripada pegawai atau agensi kerajaan boleh melapor-kannya kepada Ombudsman.

“Saya tidak dapat memberikan butiran mengenai Ombudsman secara terperinci tetapi secara prinsipnya, Kerajaan Persekutuan bersetuju untuk menubuhkan Ombudsman berdasarkan Pelan Antirasuah Nasional 2019-2023. Bagaimanapun Ombudsman ini akan memfokus kepada Kerajaan Persekutuan dan juga agensi-agensi yang berkaitan.

“Itulah sebabnya saya mengesyorkan sepenuhnya agar di peringkat negeri, mereka mempunyai Ombudsman sendiri yang memfokus kepada pihak berkua-



Abu Kassim Mohamed

sa tempatan,” katanya selepas menyaksikan perasmian Pelan Anti-Rasuh Negeri Sembilan (ANTS) 2020-2024 yang disempurnakan Menteri Besar Negeri Sembilan, Datuk Seri Aminuddin Harun, di Wisma Negeri, di sini semalam.

Terdahulu, ketika melancarkan pelan itu, Aminuddin berkata, ia adalah tindakan susulan daripada NACP dan Negeri Sembilan menjadi negeri kedua yang membangunkan pelan antirasuah di peringkat negeri selepas

Sabah pada tahun lalu.

“Pelaksanaan Pelan Anti-Rasuh Negeri Sembilan bagi tempoh lima tahun akan datang ini amat signifikan dalam mencerminkan harapan rakyat untuk membentuk sebuah negeri yang bebas rasuah dengan warganya membudayakan ketelusan, akauntabiliti dan integriti,” katanya.

Aminuddin berkata, ANTS mempunyai lima bidang keutamaan yang terdiri daripada tadbir urus politik, sektor pentadbiran awam, perolehan awam, perundangan dan kehakiman serta penguatkuasaan.

“Di bawah lima bidang keutamaan ini, terdapat lima strategi yang digariskan dengan 97 inisiatif untuk dilaksanakan oleh semua jabatan dan agensi di bawah pentadbiran Kerajaan Negeri Sembilan,” katanya sambil menambah pelan itu akan menjadi sumber rujukan yang signifikan dan komprehensif dalam menangani isu tadbir urus, integriti serta rasuah. BERNAMA